



Osudivani diler varao maloljetnice

Prema nezvaničnim informacijama, još nekoliko djevojčica je bilo žrtva Uzeira Čovića i njegovog saučesnika

Robijaš Uzeir Čović, koji je uhapšen u Bihaću u akciji Vir zbog sumnje da je učestvovao u prodaji i podvođenju maloljetnice iz BiH na prostituciju, pušten je, nakon odluke državnog tužitelja, na slobodu.


Težak položaj

Čović je priveden u okviru međunarodne akcije Vir, koju su izveli pripadnici Agencije za istrage i zaštitu BiH (SIPA).

Radi se o predmetu u kojem Tužilaštvo BiH vodi istragu o nezakonitom odvođenju maloljetnice iz BiH radi seksualnog iskorištavanja i prostitucije na području Austrije. Iz Tužilaštva BiH jučer je saopćeno da su aktivnosti realizirane u suradnji sa partnerskim institucijama Hrvatske.

- Radi se o istrazi koja se odnosi na nezakonito odvođenje malodobne osobe sa područja Cazina, pod krinkom uposlenja u ugostiteljskom objektu na području Austrije, a sa stvarnom namjerom iskorištavanja teškog položaja žrtve radi seksualne eksploatacije, pojašnjavaju u Tužilaštvu BiH te ističu da su žrtvi pružene pomoć i skrb nadležnih institucija.

Čović i njegov saučesnik, koji se nalazi u pritvoru u Hrvatskoj, terete



Pripadnici SIPA su osumnjičenog uhapsili po izlasku iz KPZ-a Bihać

se da su u julu prošle godine prevarili 17-godišnjakinju iz Velike Kladuše obećavši joj posao u Austriji.

Njihova namjera je osujećena u Zagrebu, kada je glavni osumnjičeni pokušao da siluje maloljetnicu. Tada je hrvatska policija otkrila slučaj i pokrenuta je opsežna istraga.

Podeblji dosje

Ubrzo je u Zagrebu uhapšen Čovićev saučesnik koji je smješten u

pritvor i koji se tereti za međunarodnu trgovinu ljudima, navođenje na bludne radnje i prostituciju, saznavamo od izvora bliskog istrazi koji dodaje da se radi na identifikaciji i drugih žrtava u ovom predmetu.

Kako Oslobođenje saznaje, Čović odranije ima podeblji policijski dosje. Hapšen je u nekoliko navrata zbog različitih krivičnih djela, a u KPZ-u Bihać je proteklih 14 mjeseci proveo zbog dilažanja droge. **A. B. Č.**